



Aqqalu C. Jerimiassen

UKA 2022/11

Atassut

10. november 2020

Nunatta Karsiata 2021-imut naatsorsuutaasa Inatsisartunit akuerineqarnissaat pillugu Inatsisartut aalajangiiffigisassaattut siunnersuut.

(Aningaasaqarnermut Naligiisitaanermullu Naalakkersuisoq)

2021-imi aningaasaqarnikkut nalunaarutit ataatsimiitsitaliamit isumaqatigiittumik innersuussutigineqarsimanerat saqqummiunneqartoq Atassummiit iluarisimaarnartutut nalilersinnaavarput.

Atassummiillu maluginiangerput imatut oqaasertalerusupparput, ukioq kingulleq saqqummiunneqartunut naleqqersuutissagaanni, allannguutit annertuut pivallaarsimangikkaluartut, taamaattoq Covid-19-ip inuiaqatigiinni eqquinerlorujussuarneranit aningaasartuutaasariaqavissimasut erseqqissumik takussutissartaqarmata naammangisimaarnarpoq.

Covid-19 maanna qaangersimalerparput aningaasarsiorinitsinnut eqqarsaatigissagaanni.

Tamannali qaangiukkaluaannartoq, ajornartorsiut nutaaq ajoraluartumittaaq aallartippoq, Russit Belarus tapersorsorsiuullugu Ukraine saassummassuk, aningaasarsiorinikkut sorpassuarnittaaq nunarsuup sunneranut sunniunna eqquinerluttussanngortoq siulittuutaareerpoq.

Maannalumi Europami annertuumik maluginiarneqarlualeriivippoq, taamaattamik takorloorneqareersinnaavoq; aappaagu ukioq mannamut nunatta karsiata naatsorsuutai samisussanngulerutsigit, europami sorsunnerup aningaasatigut kingunerluutigisinnaasaanut sammiveqaratarsinnaasut.

Taamaattumik maanna inatsisartuusugut, suleqatigiiffissatsinnik tamatta nassaarniarnissarput tullinnguuttariaqaleqqavoq, aningaasap naleerukkiartornera eqqarsaatigissagaanni, pisissutaasinnaasullu taamatutaaq qaffariartornerata iluamik ingerlannginneranit kingunilimmik innuttaasunut malunnaatilimmik annertuumik iliuuseqarfiginngikkutsigit, inuiaqatigiinni nammattuunerpaasut, tassalu akunnattumik isertitallit eqqornerlugaasussanngussammata.

Aningaasarsiorfissaasinnaasunik taamaammat nunatsinnut tunngasunik ammanerusariaqaleraluarpuq, assersuutingalugu NordStream 1 – 2 EU-mut milinneqarnerisa kinguneranit takusinnaalereerparput sarfamik kissamillu sipaarniarneq annertoqisoq EU-mi ingerlalereersoq. Tamanna uagut qanoq atorsinnaangaluarparput? Immaqa siunissaq piffissaq qaninneq eqqarsaatigalugu, nunatsinni naturgasseqarfeqarsinnaaneraniq

misissuisoqarsinnaanissaanut ammaassinerusinnaasariaqalersimavugut. Nukissiuutit ataavartut, aap ila tapersersoqaagut Atassummiit sulii ineriartuarneqarnissaat, taamaattorli pissutsit maanna atuuttut eqqarsaatigissagaanni nunarsuatsinni ikummatsissamik nunaniluunniit siuarsimalluartutut isigiuakkatsinni, Parisimi isumaqatigiissummut pingaartitseqisut nunat ikummatsissaq qanoq annertutigisumik isumalluutigineraat sulii sorsunnerup kinguneranik nueriataarmat.

EU-mi ikummatissanik sulii annertuumik isumalluuteqarneq piusoq arlaatigut suleqatigiinnissamik immikkut ittumik ujartuiffiginiarsinnaasariaqaripput Atassummiit isumaqarluinnarpugut, maanna pissutsit taamaatsillugit.

Ukiullu kingullermut naatsorsuutit isigissagaanni, kukkuneruinerumut ataatsimiitsitaliap eqqummaarilluni tappiffigisariaqakkanik uparuaasimaneranit Atassummiit nersuulaarumavarput.

Isumaliuutississuutaasorlu qiviaaraani, 2.3-mi sakkortusisamik isornartorsiunerat, Atassummiit soqutiginaateqarluartutut isigivarput. Tassami ukiut siuliini tamanna takusareerparput, ataatsimiitsitaliap sakkortuumik isornartorsiutissanik peqartillugu, inatsisartut akornganni sakkortuumik aalassattoqartarsimammat, ilaatigut allaat naalakkersuisoq pineqartoq ilumut tulluarnersoq apeqqusiisarnermik annertuumik kinguneqartarnikumik.

Atassummiit ataatsimiitsitaliap sulilluarsimaneranut qujalluta, Nunatta Karsiata 2021-imut naatsorsuutaasa saqqummiunneqarnerat akuersaarparput.